

續弘簡錄元史類編

續弘簡錄元史類編卷之八

皇清詹事府少詹事仁和邵遠平戒山學

天王六

泰定皇帝諱也孫鐵木兒世祖嫡曾孫晉王甘麻剌長子英宗叔也初太子真金生三子長曰甘麻剌次曰答剌麻八剌三卽成宗答剌麻八剌先薨世祖封甘麻剌爲晉王出鎮北邊至元十三年十月二十九日生帝于晉邸世祖崩甘麻剌奔赴上都諸王大臣皆以晉王爲冢孫義當立甘麻剌乃遜位于弟而自願歸藩成宗之得立由晉王之讓也大德六年晉王薨帝襲封仍鎮北邊武仁二帝之立咸與翊戴有盟書賜南康路六萬五千戶爲食邑英宗卽位告饑賑鈔百萬貫後遣使以地七千頃歸朝廷請有司徵租歲給糧鈔執藩臣禮甚謹先是王府內史

倒刺沙得幸于帝仁宗朝以其子哈散事丞相拜住得入宿衛
偵伺中朝事久之脫歸知御史大夫鐵失與拜住意相忤欲傾
之亂且作以其故告帝至治三年宣徽使探忒來王邸與倒刺
沙言主上將不利于晉王由是二人深相要結八月二日帝獵
於禿刺之地鐵失密遣幹羅思來告曰我與哈散也先鐵木兒
失禿兒章台謀已定事成當推王爲帝又以告倒刺沙且言惟
汝與馬速忽知之勿令旭邁傑得聞也于是帝大驚命囚幹羅
思遣使赴上都以逆謀告未至而難作諸王按梯不花淇陽王
也先鐵木兒奉皇帝璽綬來迎九月癸巳帝卽位于龍居河頒
蒙古詔赦天下以也先鐵木兒爲右丞相倒刺沙平章政事乃
馬台爲右丞善僧爲左丞鐵失撒的迷失完澤馬某沙並知樞
密院事馬速忽章台同知樞密院事禿滿同僉樞密院事孛羅

爲宜徽院使旭邁傑爲宜政院使阿散爲御史中丞失禿兒爲
大司農蓋雜用新舊以安反側己亥諭銓選一歸中書惟樞密
院御史臺宣政宜徽二院得自擬奏辛丑召諸王官屬流竄邊
遠者還本部冬十月甲子遣鐵失赤斤鐵木兒等詣大都以卽
位告天地宗廟社稷

輟耕錄云晉邸入繼大統告祭太廟之諸
項陰風北來殿上燈燭皆滅良久方止

王賈奴進曰不誅元凶則陛下善名不著天下後世何從而知

非與聞其故乎帝然其言誅逆賊也先鐵木兒完者禿滿及鐵

失弟鎖南等于行在所命旭邁傑爲右丞相召陝西左丞相禿

魯通政院使紐澤並爲御史大夫遣旭邁傑至大都收鐵失及

其黨失禿兒赤斤鐵木兒脫火赤章台等悉誅之並戮其子孫

己巳太白犯亢丙子犯氐加內史按答出太師知樞密院事以

速速爲御史中丞帝發北邊十一月己丑朔焚惑犯亢車駕次

中都修佛事于昆剛殿庚寅太白犯鉤鈴乙未犯東咸辛丑帝
至大都壬寅熒惑犯氐丁未御大明殿受朝賀癸丑遣官詣曲
阜以太牢祀孔子丁巳祭遁甲五福神赦凡有罪自首者槩與
原宥十二月己未詔雪楊朵兒只蕭拜住賀勝觀音保鎖咬兒
哈的迷失李謙亨成珪王毅高昉張志弼普顏篤卜顏忽里等
宛存者召用死者各贈官壬戌役夫萬三千五百人浚鎮江漕
河及練湖戊辰追尊皇考晉王甘麻剌曰光聖仁孝皇帝廟號
顯宗皇妣晉王妃曰宣懿淑聖皇后己巳辰星犯壘壁陣庚午
盜入太廟竊仁宗及莊懿慈聖皇后黃金主自至大二年十二月
月太廟主皆範金
乙亥太常禮儀院言世祖以來太廟歲惟一享先帝始復古
制一歲四祭帝曰祭祀國之大事朕何敢簡其禮命仍舉四祭
從御史趙成慶言鐵木迭兒子鎖南及月魯禿禿哈速敦皆坐

與逆謀伏誅辛巳熒惑犯東咸癸未流逆黨諸王月魯不花于雲南按梯不花于海南曲呂不花于奴兒干孛羅兀魯思不花于海島以諸王買奴自拔逆黨逃赴上都特封泰寧王命前太師拜忽商議軍國重事倒刺沙爲左丞相敕嶺北省臣修佛事以却寇兵西僧祈禳大內以厭雷塑馬哈吃刺佛像于延春閣之徽清亭丁亥收元詔曰朕荷天鴻禧嗣大歷服側躬圖治夙夜祇畏惟祖訓是遵開歲甲子景運伊始思與天下更新稽諸典禮踰年改元可以明年爲泰定元年免大都興和差稅三年八番思播兩廣洞寨差稅一年江淮剏科包銀三年四川雲南甘肅秋糧三分河南陝西遼陽絲鈔三分除虛增田稅免幹脫逋錢賑恤雲南廣海八番等處戍軍求直言賜高年帛禁獻山場湖泊之利改吏員出身者秩許至四品是歲廣州新會民犯

長弟作亂雲南開南州大阿哀阿三木台龍買六千餘人寇哀
卜白鹽井車里于孟寇雲南西番寇鞏昌府各降詔招諭

泰定元年甲子春正月乙未重作仁宗及慈聖皇后金主成奉

安太廟以乃馬台平章政事甲辰敕譯列聖制詔及大元通制

刊木賜百官戊申八番生蠻韋光正等及楊黃五種以二萬七

千戶來降置長官司撫之己酉召親王圖帖睦爾于瓊州阿木

哥于大同丙辰封解州鹽池神曰靈富公定怯薛歹歲給鈔人

八十錠二月丁巳朔作顯宗影室甲子作佛事用僧八百人及

倡優百戲導帝師游皇城庚午選守令推官

舊制臺憲歲舉守令推官二人有罪

趙坐至是言其不便復命

中書于常選擇人用之甲戌初開經筵命張珪王結吳澄鄧

文原充講官以帝範資治通鑑大學衍義貞觀政要等書進講

是月上大行皇帝尊諡冊曰瑤圖纘緒神已御于鼎湖玉冊揚

牛禮宜于太室悼降年之不永儼立政以如新爰述徽猷用
傳信史欽惟大行皇帝文明天縱剛健日嚴辨奸邪于嗣位之
初彤庭祗畏廣儀注于熙朝之際清廟肅雝離絕封敕以杜儉人
申憲章以勵多士罰茲無赦令必惟行君臨三載而有成知周
萬物而莫隱豈運逢艱否大命靡終然號謹追崇尊名是著謹
奉玉冊玉寶上尊號曰睿聖文孝皇帝廟號英宗伏惟炳靈有
赫歆格無違祔于新宮以妥以佑

見元文類
袁桷撰

三月丁亥朔立詹

事院以太傅朶台爲太子詹事楊廷玉爲中書叅知政事也兒

吉尼知樞密院事給蒙古流民糧鈔遣還所部有擅徙者斬丙

午立八不罕弘吉刺氏爲皇后以皇子阿速吉八爲皇太子八

的麻赤兒間卜嗣封晉王夏四月庚申作昭聖皇后御容殿于

普慶寺

按昭聖皇后文宗母也此時
未應追尊作殿史必有誤

辛酉親王圖帖睦爾至自

潭州甲子車駕幸上都留諸王寬徹不花失剌平章烏伯都刺
右丞善僧等居守發兵民築渾河堤辛未月食既癸酉以禿滿
迭兒平章政事庚辰帝以風烈月食地震手詔至大都戒飭百
官曰比者災異屢見朕以憂天下爲心反躬自責謹守祖宗成
訓修德慎行爾等宜各勤乃職以答天意并令廷臣集議時政
得失五月丁亥御史董鵬南等言平章乃馬台宣徽使帖木兒
不花詹事禿滿答兒皆黨附逆徒有虧臣節乞正其罪以消天
變不報帝諭省臣曰朕卽位以來無一人能執成法爲朕言者
知而不言則不忠且陷人于罪自今凡有所見宜悉以聞使朕
明知法度不敢妄自縱欲非獨朕身天下一切政務能守法以
行則衆皆乂安反是則天下懼于憂苦又曰凡事防之于小則
易救之于大則難爾其以朕言明告有衆俾知所慎壬辰省臣

以災異皆抗疏乞罷帝曰卿等皆辭去國家大事朕孰與圖優
詔慰留之戊戌遷列聖神主于太廟新殿太祖居中南向睿宗
祔左一室世祖祔右一室裕宗祔睿宗室之左顯宗順宗成宗
以兄弟次祔世祖室之右武宗仁宗以兄弟次祔裕宗室之左
英宗祔成宗室之右凡十室太常博士劉致建議曰周制天子
七廟三昭三穆昭處東穆處西所以別父子親疎之序不使亂
也聖朝取唐宋制定爲九世遂以舊廟八室爲六世昭穆不分
父子並坐不合禮經新廟之制一十五間東西二間爲夾室太
祖室旣居中則唐宋之制不可依惟當以昭穆列之父爲昭子
爲穆則睿宗當居太祖之東爲昭之第一世世祖居西爲穆之
第一世裕宗居東爲昭之第二世兄弟共爲一世則成宗順宗
顯宗三室皆當居西爲穆之第二世武宗仁宗二室皆當居東

爲昭之第三世昭之后居左穆之后居右西以左爲上東以右爲上如此則昭穆秩然不違禮經可爲萬世法若仍累朝定制依室次于新廟遷安則顯宗躋順宗之上順宗躋成宗之上以禮言之春秋閔公無子庶兄僖公代立其子文公遂躋僖于閔之上史稱逆祀及定公正其序書曰從祀先公然僖公猶是有位之君尚不可居故君之上况未嘗正位者乎雖國家以右爲尊然古人所尚或左或右初無定制古人右社稷而左宗廟國家宗廟亦居東方豈有建宗廟之方位既依禮經而宗廟之昭穆反不合禮經乎廷議是之

見名臣奏議 初建廟時太祖居

成宗武宗仁宗並祔東室後議國朝建太廟遵古制古尚左今尊者居右爲少屈故改爲昭穆之序但太宗定宗以世天下之君皆不獲廟享憲宗亦以不祀且不禰所受丙午太白犯鬼侍國之君而兄弟共爲一世其因襲之弊如此

御史高奎上書請求直言辨邪正明賞罰帝嘉其言賜銀幣丁

未太白犯鬼積尸氣六月乙卯朔蒙化州土官高蘭神場寨主
羅九寇威楚路庚申張珪至上都奏在廷集議言逆黨未討奸
惡未除忠憤未雪冤枉未理政令不信賞罰不公賦役不均財
用不節請裁擇以回天變不報癸亥作禮拜寺于上都及大同
路給鈔四萬錠丙寅廣西兩江土官黃勝許岑世興遣其子弟
入貢各授沿邊溪洞軍民安撫使丁卯大幄殿成作鎮雷坐靜
佛寺帝受佛戒于帝師庚午置海刺禿屯田總管府己卯詔疏
決繫囚免天下和買雜役三年百官四品以下普覃散官一等
三品遞進一階遠仕瘴地身故不得歸葬者有司資給還鄉秋
七月丙戌思州平茶楊大車酉陽冉世昌寇小石邪凱江等寨
庚子命諸王伯顏帖木兒出鎮濶連東部撒忒迷失率衛士佐
太師按塔出行邊癸卯放廣閩採珠蜃戶爲民仍免差稅一年

丁未置長慶寺掌成宗幹耳朶諸事罷中瑞司汰東宮衛士

先朝

止三千八百近增至萬七千人命詹事院汰去仍舊制

廣西慶遠徭潘父絹等率衆來降八

月乙卯敕刑獄復隸宗正府刑部勿與

自皇慶元年以漢人刑名歸刑部今復置札魯

忽赤四十員理之

辛亥當作酉

遣翰林學士承旨幹赤祀太祖太宗睿宗

御容于普慶寺

初三帝御容在翰林院後屢遷置普慶寺至是帝自上都遣官賫香酒至大都致祭自是以爲

常庚午作楠木殿棕殿及中宮金脊殿丁丑罷浚玉泉山河役

九月乙酉封也速不堅爲荆王辛卯罷哈思的結曾思伴卜總

統所更置臨洮總管府乙巳順宗皇后忌日修佛事飯僧萬人

改邕州爲南寧路冬十月戊午立壽福總管府典累朝神御殿

祭祀庚申命左右丞相日直禁中事則赴中書丙寅太白犯

斗巳巳入斗太陰犯填星庚午太白犯斗真州珠金沙河松江

府吳江州諸河淤傭民丁浚之命有司兼知渠堰事

通考云江浙省言吳

松江等處河道壅塞宜爲疏濬仍立牒以節水勢用夫四萬餘人以三月畢工由是吳松舊江二道烏泥涇大盈浦二河俱通
丁丑封親王圖帖睦爾爲懷王以魯國大長公主女妻之壬午
熒惑犯壘壁陣遣官分鈐閩海兩廣四川雲南選十一月元文無

己亥以木溫台知樞密院事辛丑造金寶蓋飾以珍寶貯佛舍利甲辰作歇山鹿頂樓于上都十二月癸丑朔雲南徭阿吾爲寇庚申同州地震癸亥鹽官州海溢有司請壘石爲塘帝曰築塘是重勞吾民也其增石固扞禦之丙寅敕修英宗顯宗實錄定內外官行禮雨雪免朝服庚午熒惑犯外屏乙亥太白經天曲赦重囚三十八人爲三宮祈福是歲兩浙及江東諸郡水旱壞田六萬四千三百餘頃大同渾源河真定漳沱河陝西渭水黑水任縣沙澧洛水定州屯河渠州江水皆溢漂民居成紀縣山崩水溢壅土至來谷河成丘阜各獨賑有差

二年乙丑春正月丙戌辰星犯天雞戊戌西番參卜郎來降賜其長班術兒鈔帛辛丑命懷王圖帖睦爾出居建康壬寅太白犯建星戊申以乞刺失思八班藏卜爲吐番路宣慰使都元帥往鎮參卜郎之地庚戌帝諭宰臣曰向者卓兒罕察苦魯及山後皆地震內郡大小民饑朕惟太祖開創之艱世祖混一之盛期與人民共享安樂常懷祇懼災沴之至莫測其由豈朕思慮有所不及而事或僭差天故以此示儆其與諸司集便民之事定議以聞閏月壬子朔大赦天下除江淮朔科包銀免被災地方差稅一年罷不急工役置惠遠倉永需庫于海刺禿總管府罷永興銀場聽民開採輸稅已卯山東廉訪使許師敬請頒族葬制禁用陰陽相地邪說修濬沱河堤及野狐色澤桑乾三嶺道二月丙戌頒道經于名山宮觀命道士祭五福太乙神丁亥

平伐苗部長的孃率戶十萬來降庚寅熒惑辰星填星聚于畢
廣西徭蠻潘寶陷柳城己亥封阿里迷失爲和國公張珪爲蔡
國公以善僧平章政事庚子以黃河屢決立行都水監于汴梁
命瀕河有司兼知河防事丙午造玉御床及象輦咸平府清河
寇河合流失故道壞堤堰役蒙古軍及民丁數萬修築夏四月
癸巳敕宿衛馬馳歸官廐毋散牧民間丁未封后父火里兀察
兒爲威靖王戊申以許師敬爲中書左丞馮亨參知政事五月
壬子車里陶刺孟及大阿哀蠻兵乘象寇陷朶刺等十四寨木
邦路蠻入廟率焚燹寇陷倒八漢寨督邊將嚴設備癸丑龍牙
門蠻遣使來貢辛未罷京師官鬻鹽改河間鹽運司爲大都河
間等路都轉運鹽司癸酉融州否泉洞吉龍洞峒村山黑江諸
徭爲寇丙子以國用不足敕減廐馬汰衛士罷營繕節諸王歲

賜停書金字藏經置諫議書院于昌平祀唐進士劉蕡河決大梁六月己卯朔皇子生命巫被除內宮丙戌填星犯井鉞星潯州平南縣獠作亂達魯花赤都堅都監姚泰亨死之丙申中書參政左塔不台言大臣兼領軍務前古所無鐵失以御史大夫也先帖木兒以知樞密院事皆領衛兵如虎而翼故成逆謀今軍衛之職勿令大臣兼領庶勦舊之家得以保全帝嘉其直賜幣鈔丙午填星犯井丁未敕營造母役五衛軍雲南阿只弄哀培蠻兵寇開南州白葵寇雲龍州秋七月戊申朔大小車里蠻獻馴象甲寅鎮康路土官你囊謀粘路土官賽丘羅來降左丞許師敬編類帝訓成更名皇圖大訓命于經筵進講以師敬充經筵官己未置車里軍民總管府以土人寒賽爲總管癸亥遣湖廣左丞乞住等將兵討廣西叛獠特命諸王幹耳朶罕監其

軍海北猺長盤吉祥寇陽春庚午思州洞蠻楊銀千等來獻方
物封駙馬李羅帖木兒知樞密院事火沙並爲郡王壬申加朶
台太傅禿忽魯太保日至禁中集議國事敕山東州縣收養流
民遺嬰八月戊子修上都香殿癸巳歲星犯天罇辛丑敕諸王
私入京者勿供億諸部曲宿衛私入京者加罪命慶文監汰阿
塔赤所掌駝馬九月戊申朔分天下爲十八道遣使宣撫詔曰
朕祇承洪業夙夜惟寅凡所以圖治者悉遵祖宗成憲曩者屢
詔中外百司宣布德澤蠲賦詳刑賑恤貧民思與黎元共享有
生之樂尚慮有司未體朕意庶政或闕惠澤未周承宣者失于
撫綏司憲者怠于糾察俾吾民重困朕甚憫焉今遣奉使宣撫
分行諸道按問官吏不法詢民疾苦審理冤滯凡可以興利除
害者從宜舉行四品以上有罪停職申請五品以下就便斷決

其有政績尤異暨晦跡丘園才堪輔治者具以名聞命馬合某
李處恭之兩浙江東道朶列禿齊履謙之江西福建道舉林伯
蒙弼之江南湖廣道李家奴朱黃之河南江北道阿吉刺曾立
之燕南山東道別帖木兒韓讓之河東陝西道納哈出董訥之
山北遼東道衆家奴韓庭茂之雲南省寒食劉文之甘肅省禿
里帖木兒廉惇之四川省帖木兒不花吳秉道之京畿道已酉
散有司治義倉募富民入粟拜官以備賑二千石從七品千石
正八品五百石從八
品三百石正九品
不願仕者旌其門諸王幹節遣使貢金浮屠甲寅禁饑民結扁
擔社傷人者滿杖丁丑浚河間陳玉帶河冬十月戊寅朔廣西
岑世興復叛結八番蠻寇上林等州壬辰熒惑犯氐癸巳填星
退犯井丁酉廣西猺蠻何童降請防邊自効十一月元文
無戊申
周王和世琜遣使獻豹改長寧軍爲州丁巳幸大承華普慶寺

祀順宗昭獻元聖皇后于影堂戊午填星退犯井及鉞星庚申
廣西宣慰使獲猺賊潘寶下之獄其弟潘見復寇柳州壬戌定
軍民官廕襲者由本貫圖宗支申請銓授加倒刺沙錄軍國重
事丁卯罷蒙山銀冶提舉司壬申諸王幹耳朵罕以追捕廣西
猺寇上聞帝曰朕自卽位累詔天下憫恤黎元惟廣猺屢叛殺
掠良民故命爾等往討今聞迎降者衆宜更以恩撫之若果不
悛嚴兵追捕勿縱十二月戊寅命塔失帖木兒爲右丞相錄軍
國重事封薊國公乙酉癸惑犯天江辰星犯建星甲午太白犯
壘壁陣詔山東陝西湖廣地接戎彝選宗室重臣往鎮京師多
盜增置邏防官兵立捕盜賞格壬寅右丞趙簡請行區田法于
內地以宋董煟所編救荒活民書頒州縣是歲保定路饑賑鈔
四萬錠糧萬五千石雄州水溢被災萬一千六百戶死者給鈔

以葬內郡饑賑鈔十萬錠米五萬石

通考云是歲海運江南糧一百七十萬石至京師時

廷議海漕事康里回回以廩積方饒奏減糧數以舒東南民力帝可其奏

三年丙寅春正月丙午朔高麗國王王章遣使賀正旦

自世祖至元二

十一年正旦高麗使者不會至是復至然其後亦不數見云

播州蠻長黎平慶等來降壬子

徵前翰林學士吳澄不起置都水庸田司于松江掌江南河渠

水利已未以山東湖廣官田賜民耕人各三頃仍給牛具辛酉

太白犯外屏二月壬午廣西全茗州土官許文傑作亂知州李

德卿死之以乃馬台知樞密院事丁亥罷征徭兵召幹耳朶罕

還本鎮戍兵如故丙申建顯宗神御殿于盧師寺賜額大天源

延聖寺戊戌

史記甲戌

建殊祥寺于五臺山賜田三百頃庚子以察

乃平章政事甲辰立典醫署隸詹事院三月乙巳朔帝以不雨

自責命審釋重囚遣使分祀嶽瀆及京城寺觀丙午填星犯井

及鉞星癸丑八番巖霞洞蠻來降歲輸布二千五百匹丁巳遣
諸王失刺鎮北邊甲子命功德司簡歲修佛事一百三十七戊
辰焚惑犯壘壁陣填星犯井庚午填星太白歲星聚于井辛未
泉州民阮鳳子作亂寇陷城邑軍民官失討坐罪夏四月丙戌
鎮安路土官岑修廣爲弟修仁所攻來告命湖廣行省撫治之
戊戌太白犯鬼壬寅焚惑犯壘壁陣夔路米洞蠻田先什用等
結十二洞蠻爲寇湖廣行省遣九姓長官招降之修夏津武河
堤役夫萬七千五百人五月甲辰朔

史記
甲戌

修鎮雷佛事三十一

所乙巳罷福建歲供蔗餉廣西岑世興及鎮安路岑修文合山
獠角蠻入寇命湖廣雲南兩省招諭之遣指揮使兀都蠻鐫西
番呪語于居庸關崖石庚午湖廣永明縣五洞河西加木籠四
部來降各立其土官領之六月癸酉朔播州蠻黎平愛謝烏窮

爲寇宣撫使楊燕里不花招平愛出降烏窮不附命湖廣行省討之己亥納皇姊壽寧公主女撒答八刺于中宮秋七月甲辰造紫豹璽車三十乘丁未酉陽寨土官冉世昌寧遠州洞蠻刁用並入寇壬子修黑牙蠻答哥佛事于水晶殿皇后受戒殿中鑄五方佛銅象戊午敕入粟拜官者准致仕銓格戊辰太白經天河決陽武漂民居萬六千五百餘家詔壅京城外棄骸八月戊寅以星變罷獵下詔恤民通考云詔宮中買寶貨命省臣依累朝呈獻例給價毋得勒減稽遲以病商人甲午罷行宣政院及功德司丁酉太白犯軒轅御女辛丑作天妃宮于海津鎮自世祖末年每海漕至先遣官祀天妃累朝無虛歲鹽官州海溢壞隄三十餘里遣使祭海神大都昌平大風壞民居九百家九月辛亥命帝師修灑淨佛事于大明興聖隆福三宮癸亥太白犯太微垣右執法戊辰湖廣雲南各寨土官奉方物來獻卽其地

置木朶路木來州孟隆路哀培各甸並給印冬十月辛未朔發

卒四千人治通州道辛巳太白犯進賢癸未

史記作酉

河水溢汴梁

壞樂利堤役丁夫六萬四千人築之賜大天源延聖寺吉安臨

江二路田千頃省臣言養給軍民必藉地利世祖建大宣文弘

教等寺賜永業當時已號虛費成宗復構天壽萬寧寺較前用

增倍半若武宗之崇恩福元仁宗之承華普慶租權所入益又

甚焉英宗鑿山開寺損兵傷農而卒無益夫土地祖宗所有子

孫當共惜之臣恐茲後藉爲口實妄興工作徵福利以逞私欲

帝嘉其言終不能用十一月庚子命翰林集世祖嘉言善行爲

聖訓以時省覽兼備經筵進講癸卯敕西僧每當元辰疏釋重

囚仍聽宗正府審奪辛亥追復前平章政事李孟官乙卯太白

犯鍵閉辛酉廣西透江團徭及扶靈青溪櫟頭等原蠻並爲寇

播州蠻宋王保來降徙上都清寧殿于伯葉兒行宮十二月

元文

無壬午御史賈垕請祔武宗皇后于太廟不報

皇后列傳稱泰定四年崩而本

紀稱是年請祔不符侯考

帝欲于來年元夕構燈山于內廷御史趙師魯諫

遂罷其事丙戌聽陰陽家言發鈔三千錠施僧道及乞人繫囚

以禳天變丁亥寧夏地震者四庚寅召江浙右丞趙簡爲集

賢大學士領經筵事己亥亳州河溢大寧路水漂民居各八百

餘家扶靈洞蠻劉季等來降是歲海運米至京師者三百三十

五萬一千餘石賑饑民米計一百二十餘萬石給鈔半之終元

之世爲最多

四年丁卯春正月乙巳御史臺請親祀郊廟帝曰朕遵世祖遺

制其命大臣攝祀己酉太白犯牛壬子以中政院金銀鐵冶歸

中書命靖安王濶不花出鎮陝西諸王火沙阿榮答里皇子允

丹藏卜

泰定第三子

先後鎮北邊丁卯浚會通河築鄯州護倉堤役

夫三萬人二月辛卯白虹貫日三月辛丑遣使江南求奇花異果癸卯和寧路地震丙午潮州路判官錢珍挑推官梁楫妻劉氏不從誣楫下獄殺之事覺珍自殺詔戮尸傳首辛酉命前太師伯忽預議大事食其俸終身召翰林學士承旨張珪集賢大學士廉恂太子賓客王毅悉復舊職敬儼爲集賢大學士並商議中書省事給累朝舊寶價鈔十萬二千錠渾河決發軍民萬人塞之丁卯焚惑犯井以阿散火者知樞密院事夏四月辛未盜竊武宗金主及祭器以典守不嚴罷太常院官癸未鹽官州海溢命都水少監張仲仁發工匠二萬餘人塞之不止癸巳高州徭寇電白縣千戶張恒戰死賜祠曰旌義甲午奉安武宗新主以阿昔兒爲御史大夫五月乙巳命天師張嗣成修醮鹽官

州祀海發義倉粟賑其民丁卯罷諸王分地州縣長官世襲俾如常調官以三載爲考元江路土官普山

一作普雙

坐賊免遂結蠻

兵作亂收復其舊職德慶路徭來降歸所掠男女悉給其親六月辛未命翰林譚資治通鑑以進丁丑以災異罷兩都土木減諸郡繁囚乙未紹慶路四洞蠻阿者降命爲蠻酋長官秋七月丁酉元江普山復叛己亥內郡江南旱蝗薦至丞相以下並乞解職有旨無多辭朕當自儆卿等亦宜各欽厥職建橫渠書院于郿縣祀宋儒張載甲辰播州謝烏窮來獻方物丁未敕經筵講讀官非有代不得去職甲寅市旄牛于西域丙寅塞保安鎮渠役民丁六千人八月戊辰罷奉元路採捕珍禽異獸渾沱河溢發丁浚冶河以殺其勢湖廣苗蠻祭伯秧寇李陀寨乙酉作欽明殿成癸巳諡武宗皇后曰宣慈惠聖

后傳是年十一月崩而本紀作是月升祔

互異
侯考
英宗皇后曰莊靜懿聖升祔太廟發衛軍八千人修白浮

瓮山河堤鳳翔興元成都峽州江陵同日地震九月丙申朔日
食敕國子監仍舊制歲貢生員業成者六人禁僧道買民田壬
子太白犯房甲子定職官賊汚者流之廣海閏月己巳太白經
壬子中以災變赦天下仍祀天地享太廟致祭嶽瀆諸神冬十
月己酉復以趙世延爲中書右丞王士熙參知政事傅巖起爲
吏部尚書御史韓鏞言尚書三品秩巖起由吏累官四品於法
不得升遂止戊午辰星犯東咸壬戌命太常纂修累朝禮儀開
南土官阿只弄復率蠻兵爲寇十一月庚午授思州土官田仁
爲宣慰使播州謝烏窮爲蠻彝長官雲南蒲蠻來附卽其地置
順寧府癸酉太白犯壘壁陣乙亥焚惑犯天江辛卯陽曲縣地
震十二月庚子定捕盜格限內不獲者償其贓己未歲星退犯

太微西垣上將是歲發米二十四萬九千石賑大都饑三十萬

石散京師流民

通考云時有大星隕于獲嘉縣之墟初出爲黑石土有點如星擊之鏘然人不言舉之則動言

則弗動土人以爲怪積薪焚之雷雨交作乃止

致和元年戊辰春正月乙亥諭百司凡不赴任及擅離職者奪

其官避差遣者笞之丁丑命繪蠶麥圖頒農桑舊制十四條于

天下已卯帝將畋柳林御史王獻等以歲饑諫帝曰其禁衛士

毋擾民家命御史二人沿途巡察戊子罷河南鐵冶提舉司免

陝西撈鹽罷益都諸縣食鹽二月庚申詔改元致和免河南自

實田糧被災州郡差稅一年流民復業者差稅三年疑獄繫三

歲不決者省釋壬戌太白晝見三月庚午雲南安隆寨土官岑

世忠與兄世興相攻籍其民三萬二千戶來降升其寨爲州以

世興知州事

主遷改云宋皇祐間餘姚人岑仲淑從狄青平儂州子自亭襲爲沿邊安撫使來安路

都總管後遷入喬利跨有祥柯廣西
雲南皆分疆土故岑氏之族爲最大壬申立萬戶府二領征西

紅胖禩軍甲戌雅濟國遣使來貢己卯帝御興聖殿受無量壽

佛戒甲申遣戶部尚書李家奴往鹽官祀海神命帝師造浮屠

二百一十六以鎮海己丑雲南土官撒加布降以其地隸羅羅

宣慰司徒懷王圖帖睦爾于江陵夏四月丙申欽州徭黃焱等

爲寇己亥禁蒙古色目人倣漢法守制違者除名甲寅封唐柳

州刺史柳宗元曰文惠昭靈公五月甲子遣官分護流民還鄉

仍禁聚至千人者杖一百丙寅廣西普寧縣僧陳慶安作亂建

國改元己巳大理怒江甸土官阿哀你寇樂辰諸寨庚辰有流

星大如缶其光燭地戊子以塔失帖木兒平章政事秋七月辛

酉朔寧夏地震庚午帝崩于上都壽三十六葬起輦谷終元之

世不爲帝立廟上諡止稱泰定帝

王禕曰武宗約繼世子孫兄弟相及而仁宗不守宿諾傳

位英宗仍使武宗二子出居于外及英宗遇弒而明宗在北文
宗在南晉王于世祖爲嫡孫于次爲長則求所當立者舍晉王
將誰屬耶舊傳英宗之弒晉邸與聞乎故考
之實錄皆不得其實傳聞之謬豈可信哉

冊曰長子世嫡嗣統允宜武仁先立澤永人思忽焉不世
電滅雲移或曰南坡其變與知故史具在其又誰欺

明宗皇帝諱和世球武宗長子也母妃亦乞烈氏武宗生二子
長卽帝次圖帖睦爾卽文宗成宗大德三年命武宗撫軍北邊以

四年十一月壬子生帝成宗無子武宗入承大統立弟仁宗爲

皇太子約以次傳于帝仁宗得立延祐中按仁宗紀延祐二年十一月封和世球爲

周王三年三月送周王之雲南而此及文宗紀皆云延祐三年封周王年數互異故並改延祐中以槩之議建東宮

時丞相鐵木迭兒欲固位取寵乃議立英宗爲皇太子又與太
后幸臣識烈門日譖帝于兩宮于是封帝爲周王出鎮雲南置

常侍府官屬以禿忽魯尚家奴孛羅教化等爲常侍遣就鎮帝

至延安時武宗舊臣釐日沙不丁哈八兒禿等來會潛與教化謀曰天下者我武皇之天下王之出鎮本非上意由讒搆致然請以其故白行省俾聞之朝廷庶可杜塞離間遂與數騎馳去先是阿思罕爲太師鐵木迭兒奪其位出爲陝西行省丞相及教化等至卽與平章塔察兒行臺御史大夫脫里伯中丞脫歡悉發關中兵分道自潼關河中府入已而塔察兒脫歡中變襲殺阿思罕教化于河中帝乃西行至北邊金山西北諸王察阿台等咸率衆來附帝至其部與定約每歲冬居札顏夏居斡羅斡察山春則命從者耕于野泥十餘年間邊境寧謐仁宗崩英宗嗣立以帝遠居西北不足忌而鐵失等復搆帝弟圖帖睦爾徙之瓊州英宗遇弑晉王以大宗入繼泰定元年改封圖帖睦爾爲懷王命居建康致和元年三月徙居江陵泰定帝崩于上

都時僉樞密院事燕鐵木兒者武宗舊臣也方留守京師乃召百官集興聖宮倡言曰武皇有聖子二人大統所在當迎立不從者斬之乃縛平章烏伯都刺等十人下之獄迎帝弟懷王于江陵遣弟撒敦守居庸關子唐其勢守古北口以拒上都兵懷王入京師群臣請正大統九月壬申懷王卽位于大都改元天曆時泰定帝子阿速吉八年甫九歲在上都丞相倒剌沙立之爲帝改元天順遣兵分道攻大都燕帖木兒帥師與戰上都兵屢北十月齊王月魯帖木兒舉兵應懷王圍上都倒剌沙出降兩都道路始通當是時懷王已卽位稱帝號令天下非若仁宗之于武宗虛位以待其來者顧以帝居長恐不厭人望于是遣撒迪等相繼來迎帝遂發北邊舊臣尚家奴孛羅哈八兒秃從至金山嶺北武寧王徹徹秃僉樞密事帖木兒不花相繼至乃

命孛羅如京師兩都民聞帝使者至驩呼載道曰吾天子果自
北來矣諸王舊臣爭先迎謁所至成聚天曆二年正月乙酉撒
迪等至入見帝于行幄陳懷王固讓意丙戌帝卽位于和寧之
北扈行諸王大臣咸入賀乃遣撒迪還京師命之曰朕弟曩好
書史邇者得無廢乎聽政之暇宜親賢士大夫講論史籍可知
古今治亂得失汝往當以朕意諭之二月壬辰宣靖王買奴自
京師來覲辛丑追尊皇妣亦乞烈氏曰仁獻章聖皇后三月戊
午朔懷王遣燕鐵木兒奉皇帝寶來上御史中丞八卽刺知樞
密院事禿兒哈等各率其屬以從四月癸巳燕鐵木兒見帝于
行在率百官上皇帝寶帝嘉其勳拜太師右丞相如故復諭曰
凡京師百官朕弟所用者並仍舊職燕鐵木兒奏國家大事所
繫者中書省樞密院御史臺宜擇人居之帝然其言乃以武宗

舊臣哈八兒禿平章政事伯帖木兒知樞密院事孛羅爲御史大夫甲午立行樞密院命知樞密院火沙領行院事賽帖木兒買奴並同知行院事是日帝宴諸王大臣于行殿諭臺臣曰太祖有訓美色名馬人皆悅之然方寸一有繫累卽能敗名喪德卿等職居風紀亦嘗念及此乎天下國家譬猶一人之身中書其右手也樞密其左手也左右手有病治之以良醫省院闕失不以御史臺治之可乎凡諸王百司違法越禮一聽舉劾風紀重則貪墨懼猶斧斤重則入木深其勢然也朕有闕失卿等亦當直言毋諱又命孛羅等宣諭群臣曰世祖皇帝立省院臺及百司庶府共治天下大小職掌已有定制復命廷臣集律令章程以爲萬世法列聖相承罔不恪遵成憲朕今居世祖所居之位凡省院臺百司庶政詢謀僉同翻譯所奏以告于朕軍機重

務樞密院當卽奏聞母以夙夜爲間故爲稽留其他事果有所
言必先中書院臺其下百司贊御之臣母得隔越陳請違者罰
母赦丁酉以鐵木兒脫爲上都留守懷王立都督府及奎章閣
學士院于京師以除目來上帝從之癸卯遣使如京師卜日命
左丞相鐵木兒補化攝告卽位于郊廟社稷立圖帖睦爾爲皇
太子仍設詹事院以徹里鐵木兒平章政事濶兒吉思爲中書
右丞甲辰加官吏送寶者秩一等從者賚以幣帛乙巳監察御
史^其以北平章塔卽吉素非勳舊年已七十眊昏殊甚左丞馬
謀本晉邸部民郎中羅里禿魯忽皆晉邸衛卒不諳政務帝如
其言罷黜之仍諭自今所當言者母有所憚五月丁巳朔封帖
木兒爲保德郡王庚申賜扈蹕宿衛士鈔帛癸亥命有司新武
宗幄殿車輿庚午命燕鐵木兒升用嶺北行省官吏選用潛邸

舊臣御史大夫孛羅中政使尚家奴加特進典四宿衛士壬申
封亦憐真八爲柳城郡王以八卽刺爲西臺御史大夫衆家奴
爲中丞乙亥求皇太子故寶不知所在乃命更鑄丁丑皇太子
發京師諸王駙馬及扈衛百官悉從行載乘輿服御送行在六
月丁亥朔左丞相鐵木兒補化等以帝卽位攝告于宗廟社稷
辛亥詔諭中書省凡國家錢穀銓選諸大政以皇太子然後
奏聞癸丑丞相鐵木兒補化以久旱乞免帝曰修德應天乃君
臣當爲之事朕未嘗斯須忘也皇太子來會當與共圖澤民利
物者行之七月丙辰朔日食丙子授皇太子金寶壬午遣使詣
京師敕平章哈八兒禿同翰林國史院官致祭太祖太宗睿宗
三朝御容發諸衛軍完京城八月乙酉朔次旺忽察都之地丙
戌皇太子入見是日宴皇太子及諸王大臣于行殿庚寅帝暴

崩年三十從葬諸帝陵是月己亥皇太子復卽位十二月乙巳

上帝尊諡曰翼獻景孝皇帝廟號明宗

文宗紀作十月丙申事

國語曰護

都篤皇帝至順元年三月壬申祔于太廟後至元六年十月加
上尊號爲順天立道府文智武大聖孝皇帝

冊曰艱難備嘗人望所屬何嫌何疑推肝置腹人心不同
天命反覆論定千秋此直彼曲

續弘簡錄卷八終

續弘簡錄

卷八

七

續弘簡錄元史類編卷之九

皇清詹事府少詹事仁和邵遠平戒山學

天王七

文宗皇帝諱圖帖睦爾武宗次子明宗弟也母妃唐兀氏大德三年武宗出鎮北邊帝以八年甲辰正月癸亥生武宗崩傳位於弟仁宗延祐中仁宗立子英宗爲皇太子乃封武宗長子明宗爲周王命鎮雲南而帝尚留京師至治元年中正使咬住誣告脫歡察兒等交通親王將構異圖辭連潛邸於是出帝于瓊州未幾英宗遇弒晉王入立泰定元年正月召帝于海南行至潭州復止之居數月乃還大都改封懷王食邑端州六萬五千戶二年正月仍命出居建康

輟耕錄云文宗潛邸金陵適太平興國寺鑄大鐘爲金數萬斤方在

治上至取相嵌碧珠指環默祝曰若天命在躬此當不壞卽投
波中鐘成珠宛然在上光采煥發不以灼毀及登大寶方與近
貴公爵象

侍言向時亂天之謠又云太宗居金陵時命房大年齊京都
萬歲山大年辭以未嘗至其地上索紙爲布畫位置令按橐圖
上格法道整雖以殊祥院使也先捏掌其衛事時倒刺沙爲相
專工所莫及

狡悍自用災異數見而帝兄弟播越南北武宗舊臣恒思之致
和元年春泰定帝出畋柳林以疾還宮諸王滿秃阿馬剌台太
常禮儀使哈海宗正濶濶出等與僉樞密事燕鐵木兒謀曰今
主上疾日作將往上都脫不諱吾黨扈從者執上都諸王大臣
殺之居守者卽縛大都省臺官宣言武皇子當正位傳檄諸關
守帥則大事濟矣三月泰定帝如上都滿秃濶濶出等從以西
去王附刺武納失里居守燕鐵木兒亦留大都時也先捏私至
上都與倒刺沙圖弗利於帝乃復遷帝居江陵七月泰定帝崩
于上都倒刺沙立其子阿速吉八改元天順遣使詣大都命平
章烏伯都剌收百司印時梁王王禪遼王脫脫手握上都重兵

而燕鐵木兒質掌大都樞密符鑰謀於西安王陰圖義舉八月
甲午黎明集百官與聖宮燕鐵木兒率阿剌鐵木兒孛倫赤等
十七人兵皆露刃以欲立武宗二子意號於衆乃手縛平章烏
伯都剌伯顏察兒分命勇士執中書左丞朶朶參知政事王士
熙參議省事脫脫吳秉道侍御史鐵木哥丘世傑治書侍御史
脫歡詹事丞王桓等下之獄推前湖廣左丞相別不花爲中書
左丞相詹事塔失海牙平章政事湖廣右丞速速爲中書左丞
遣前河南參政明里董阿前宣政使答里麻失里馳驛迎帝于
江陵密以意告河南平章伯顏令簡兵備扈從己亥明里董阿
至汴梁悉執行省官收諸司印甲辰帝發江陵召鎮南王鐵木
兒不花威順王寬徹普化湖廣平章高昌王鐵木兒補化來會
執湖廣左丞馬合某

倒刺沙兄也

以別薛代之遣前西臺御史刺馬

黑巴等諭陝西陝西省臺官皆附上都不從殺去使戊申進伯
顏爲河南行省左丞相已酉上都聞大都師起其諸王大臣滿
禿阿馬剌台哈海濶濶出等謀應大都事覺剌沙盡殺之庚
戌帝至汴梁伯顏等陳兵扈行以阿不海牙代爲河南平章發
平灤民塹遷民鎮禦遼東軍辛亥命燕鐵木兒知樞密院事亦
列出爲御史中丞壬子阿速衛指揮使脫脫木兒帥其軍自上
都來歸命守古北口癸丑上都兵分道入犯脫脫木兒與戰于
宜興縣禽平章乃馬台送京師戮之諸王失剌敗走丙辰燕鐵
木兒奉法駕郊迎丁巳帝至京師入居大內戊午以速速平章
政事曹立爲中書右丞張友諒參知政事伯顏爲御史大夫趙
世延爲御史中丞也速台兒同知樞密院事上都梁王王禪右
丞相塔失鐵木兒太尉不花平章買闡御史大夫紐澤等兵次

榆林九月庚申朔燕鐵木兒督師居庸關遣其弟撒敦擊敗上都兵于榆林隆鎮衛指揮使韓都蠻以兵襲上都執諸王滅里鐵木兒脫木赤于陀羅臺歸于京師陝西兵起入河中府殺守官劫行用庫鈔以應上都太尉不花以兵掠居庸壬戌命高昌王鐵木兒補化知樞密院事也先捏爲宣徽使徵五衛屯田兵赴京師調淮西平陽保定兵列營黃河聽策應上都諸王也先帖木兒平章禿滿迭兒以兵自遼東入遷民鎮諸王八剌馬野先帖木兒以所部兵入管州丁卯諸王大臣伏闕請帝早正大位帝曰大兄在朔方以長以德當有天下朕敢紊天序乎燕鐵木兒固請帝曰必不得已必明著朕意播告中外而後可遣撒敦拒遼東兵于薊州元帥阿兀刺守居庸關上都兵攻碑樓口指揮使也速臺兒禦之不克戊辰以明里董阿驕驕台並平章

政事命襄陽萬戶楊克忠鄧州萬戶孫節以兵守武關已巳鑄御寶成立行樞密院于汴梁以也速台兒知行院事將兵行視太行諸關西擊河中潼關軍括北路民馬以摺疊弩分給守關軍士上都諸王忽刺台引兵攻崞州庚午遣軍民守歸綏諸隘辛未帝常服謁太廟分治叛黨烏伯都刺鐵木哥棄市朶朶王士熙伯顏察兒脫歡等各流遠方壬申帝卽位受朝賀改元大赦詔曰洪惟我太祖肇造區夏世祖混一海宇爰立定制以一統緒宗親各受分地勿敢妄生覬覦斯不易之成規萬世所共守者也世祖之後成武仁英惟公天下之心以次相傳宗王貴戚咸遵祖訓至於晉邸具有盟書願守藩服而與賊臣鐵失等潛通陰謀冒干寶位使英宗不幸罹於大故朕兄弟播越南北備歷艱險臨御之事豈復與聞朕以叔父之故順承惟謹于今

六年災異迭見權臣倒刺沙等專權自用疎違勳舊廢棄忠良
變亂祖宗法度空府庫以私其黨類大行上賓利於立幼顯握
國柄用成其奸宗王大臣以宗社之重統緒之正協謀推戴屬
於眇躬朕以菲德宜俟大兄固讓再三宗戚將相百僚耆老咸
謂神器不可久虛天下不可無主周王遼隔朔漠民庶皇皇已
及三月誠懼迫切朕姑從其請謹俟大兄之至遂朕固讓之心
已於致和元年九月日卽皇帝位其以致和元年爲天曆元年
可大赦天下於戲朕豈有意於天下哉重念祖宗開創之艱恐
隳大業是以勉徇輿情尚賴爾中外文武臣僚協心相予輯寧
億兆以成治功咨爾多方體予至意癸酉封燕鐵木兒爲太平
王將兵擊遼東軍徵左右兩阿速衛老幼軍赴京師不行者斬
乙亥罷會福殊祥二院立太禧院設壽福會福隆禧崇祥四總

管府隸之分奉神御殿祠祭上都梁王王禪兵襲居庸關將士皆潰燕鐵木兒軍次三河丙子王禪游兵至大口燕鐵木兒還軍次榆河帝出齊化門視師戊寅帝諭中外曰近以姦臣倒刺沙烏伯都刺潛通陰謀變易祖宗成憲既已明正其罪凡回鶻種人不預其黨者各安業勿懼有因而扇惑者罪之敕軍中逃歸及京城游民敢攘民財者斬命留守司完京城軍士乘城守禦燕鐵木兒與王禪前軍戰于榆河北敗之追奔至紅橋阻水而陣上都樞密副使阿剌帖木兒指揮使忽都帖木兒以兵會王禪來助戰又敗之庚辰太白犯亢辛巳以別不花知樞密院事依前中書左丞相燕鐵木兒與上都兵復戰于白浮之野敗之脫脫木兒與遼東軍戰于薊州之檀子山王禪等遁崑山州次日收集散亡復來戰撒敦脫脫木兒前後夾擊又敗之追及

昌平北王禪單騎走甲申慶雲見定各道廉訪官用蒙古二人
畏吾河西回鶻漢人各一人各司書吏以職官教授各路司吏
鄉貢進士參用御史臺經歷品秩相常者除各道廉訪使都事
除副使譯史通事考滿不得除御史靖安王濶不花將陝西兵
潛山潼關南水門入分據陝州乙酉以明里董阿平章政事燕
不鄰知樞密院事上都兵入古北口分掠石槽燕鐵木兒先遣
撒敦倍道趨石槽掩其不備擊之自率大兵繼至轉戰至牛頭
山擒駙馬孛羅帖木兒等送闕下戮之脫脫木兒與遼東軍戰
薊州南殺獲無算調河南蒙古軍五萬人增守京師臨清萬戶
府軍萬三千五百人守益都般陽諸海港丁亥遼東軍抵京城
燕鐵木兒拒之募丁壯乘城固守令冀寧晉寧所轄代州雁門
關崞州陽武關嵐州大潤口皮庫口保德州寨底天橋白羊三

關石州塢堡口汾州向陽關隰州烏門關吉州馬頭秦王嶺二
關靈石縣陰地關皆穿塹壘石以爲固戊子上都諸王忽刺台
兵入紫荆關行樞密院卜顏幹都蠻指揮使也速臺兒將兵拒
之西臺御史大夫也先帖木耳起兵從大慶關渡河殺河中府
官河東官吏聞風棄城走召雲南左丞相也兒吉尼不至冬十
月己丑朔燕鐵木兒引兵至通州擊敗遼東軍遣脫脫木兒將
兵授紫荆關調江浙兵禦潼關河南兵守虎牢關庚寅燕鐵木
兒與遼東軍夾潞水而陣遼東軍宵遁辛卯以卽位告郊廟社
稷時享之禮改用仲月癸巳忽刺台游兵進逼南城令京城戶
出壯丁一人持兵仗從軍士守城仍於諸門列甕貯水以防火
燕鐵木兒及陽翟王太平國王朶羅台戰于檀子山之棗林其
子唐其勢陷陣殺太平次者蔽野甲午脫脫木兒章吉與也先

捏合擊上都兵于良鄉轉戰至盧溝橋乙未燕鐵木兒率軍循
北山西趣良鄉時諸將與忽剌台阿剌帖木兒戰于盧溝橋聲
言大軍至上都兵潰遣使頒詔至陝西省臺官毀詔械使者送
上都湘寧王八剌失里引兵入冀寧敕萬戶和尙將兵由故關
援之殺獲甚衆會上都兵大至和尙退保故關冀寧遂破戊戌
調湖廣平章乞住以兵守歸峽左丞別薛守八番以備四川軍
諸將追阿剌帖木兒至紫荆關獲之送京師棄市平章禿滿迭
兒引遼東軍復入古北口燕鐵木兒與戰于檀州南敗之走還
遼東辛丑以脫脫木兒知樞密院事亦列赤爲御史大夫齊王
月魯帖木兒東路蒙古元帥不花帖木兒以兵圍上都倒剌沙
等奉寶出降梁王王禪遁遼王脫脫被殺上都平壬寅以也先
捏知行樞密院事章吉爲行院副使與知院事也速台兒等將

兵西擊潼關也先鐵木耳軍至晉寧本路官皆遁甲辰罷晉邸
及遼王所轄路府州縣達魯花赤選流官代之丙午敕凡有罪
者既籍其家妻子並免入官丁未以欽察台平章政事珙瑯不
花爲御史中丞以度支經用不足權停諸王駙馬宿衛官及內
侍宮人歲給芻豆陝西兵至鞏縣黑石渡遂據虎牢進薄武關
庚戌帝御興聖殿齊王月魯帖木兒奉上皇帝寶劍刺沙至京
師下之獄詔罷內郡兵江浙兵往潼關者仍還鎮辛亥雲南徵
里路上官刁賽銀羅甸土官哀贊等來貢癸丑燕鐵木兒辭知
樞密院事命其叔蒙古元帥不花帖木兒代之覈上都倉庫錢
穀甲寅罷徽政院改立儲慶司湘寧王八剌失里趙王馬札罕
諸王忽剌禰承上都命各起兵南侵冀寧還次馬邑元帥也速
答兒執送京師也先鐵木耳兵北趨懷孟至潞州鐵木哥南破

武關入鄧州河南大震丁巳毀顯宗室升順宗祔右穆第二室
成宗祔右穆第三室武宗祔左昭第三室仁宗祔左昭第四室
英宗祔右穆第四室戊午奪上都官吏符印制敕盜殺太尉不
花有司論盜當抵法帝以不花不道衆所共知有盜从十一月
己未重給內外百司印命太保伯答沙總兵北邊給遼東降軍
行糧遣還民間子女被掠者令追理完聚庚申汰近歲白身爲
官者辛酉也先捏兵至武安也先鐵木耳以軍降河東州縣盡
殺僞署官吏癸亥帝宿齋宮甲子服袞冕享太廟辛未鐵木哥
兵入襄陽知縣谷庭珪主簿張德成之癸酉雲南土官元江普
山姚州高明威楚路脫放九十九寨必也姑等各來貢甲戌安
置泰定后及二妃于東安州杖諸王失刺流之遠方丁丑荆王
也速也不干傳檄至襄陽鐵木哥引兵走庚辰遣使奉迎周王

于漠北以敬儼平章政事徹里帖木兒爲中書左丞玘璐不花爲右丞癸未倒刺沙伏誅磔其尸王禪亦賜死馬某沙紐澤撒的迷失也先鐵木耳等皆棄市甲申命威順王寬徹普化還鎮湖廣罷行宣政院及行都水監左丞相別不花罷十二月己丑朔以天壽節禁屠宰詔海舶至福建博易者江浙行省選廉吏征其稅丙申史說作午幸大崇恩福元寺謁武宗神御殿竄也先捏于南寧庚子大赦追賜諸王滿禿爲果王阿馬刺台爲毅王濶濶出等十七人並賜功臣號命有司刻其功于碑陝西省臺官焚毀詔書坐當流以赦故永不錄用辛丑立龍翊侍衛親軍都指揮司分掌欽察軍設內宰司隸儲慶司罷中瑞司乙巳加伯顏太尉與亦列赤並爲御史大夫戊申加伯顏太保知樞密院事甲寅復遣侍御史撒迪內侍不顏禿古思奉迎周王于漠北

丁巳以微里鐵木兒轉中書右丞躍里鐵木兒爲左丞趙世安
叅知政事戊午免被兵郡縣雜役弛山場河湫禁私貸者俟秋
成責償許蒙古色目人居喪守制是月復召雲南也兒吉尼又
不至加諡唐司徒顏真卿正烈文忠公陝西自泰定二年至是
不兩大饑民相食杭州鎮江池州等路水浸民田萬四千餘頃
河北山東有年

天曆二年己巳春正月己未朔立都督府總左右欽察及龍翊
衛軍庚申遣太府太監沙剌班奉金幣赴周王行在辛酉命高
昌王鐵木兒補化爲左丞相王毅平章政事欽察台知樞密院
事燕鐵木兒爲御史大夫甲子太白犯壘壁陣辛未封知樞密
事火沙爲昭武王朶列帖木兒復爲楚王甲戌復鹽制每四百
斤爲引引爲鈔三錠丁丑減鷹坊等食

按鷹鵞獅豹之食舊支肉價二百餘錠近增至

萬三千八百錠舊止六百二十辛巳起復中書左丞史惟

良爲御史中丞以阿不海牙平章政事壬午贈緱山處士杜瑛

爲翰林學士諡文獻癸未遣宣靖王買奴往周王行在丙戌周

王卽位于和寧是爲明宗二月庚寅命燕鐵木兒復爲右丞相辛卯

立妃弘吉刺氏爲皇后帝御殿受朝賀廣西思明路總管黃克

順來貢癸巳遣翰林侍講學士曹元用祀孔子于闕里辛丑追

尊皇妣唐兀氏曰文獻昭聖皇后雲南蒙恩蒙算甸開南銀沙

羅甸等土司各入貢己酉癸亥犯井辛亥合肥縣地震壬子命

有司造行在帳殿甲寅立奎章閣學士院于興聖殿西命儒臣

進講經史設羣玉署藝文監隸之復設藝林庫廣成局隸藝文

監輟耕錄云奎章閣爲屋三間南間以藏物中間諸官入直所

奎章閣學士院置羣玉內司掌秘玩古物藝文監檢校書籍

書博士鑒辨字畫授經郎敎法薛官大臣子孫藝林庫收貯羣

書廣成局印行國制等書製牙牌五十上書奎章閣散各官懸

佩出入宮門無禁東山文集云建奎章閣命虞集撰記

刻石識以天曆之寶或加用奎章閣寶應賜者必閣學士持

楊前四復奏然後予之視北雜志云奎章閣壁有宋徽宗書

承平殿曲宴圖并命更鑄鈔板毀其刊者三月辛酉遣燕鐵木

書自製曲宴記

兒奉皇帝寶詣行在復命有司資金千五百兩銀七千五百兩

幣帛四百匹金腰帶二十副以備賜予癸亥命造乘輿服御北

迎大駕改潛邸所幸諸路名建康曰集慶江陵曰中興瓊州曰

乾寧潭州曰天臨戊辰雲南諸王答失不花等數丞相也兒吉

尼專擅十罪將殺之也兒吉尼遁入八番答失不花僞署叅政

等官已已建大龍翔集慶寺給鈔萬錠丁丑帝母文獻昭聖皇

后神御殿月祭命如列聖故事夏四月癸卯行在遣武寧王徹

徹禿來錫命立帝爲皇太子丙午占臘國貢羅香木及象豹白

猿戒諸王分邑達魯花赤受代不得仍畱官所其父兄所居官

續弘簡錄

卷九

文宗

子弟不得再任辛亥賑鄧州通州被兵民所俘子女命遼陽行
省簿錄完聚河南陝西諸路饑名商入米中鹽行入粟補官令
并括江淮僧道餘糧五月丁巳朔遣翰林學士承旨阿鄰帖木
兒北迎大駕庚申太白犯鬼甲戌命中書省擬注中書六部官
奏于行在丙子改儲慶司爲詹事院丁丑皇太子發京師北迎
戊寅次大口庚辰次香水園六月丁亥朔鐵木兒補化以旱乞
避相位諭曰皇帝遠在沙漠未能卽至是以躉攝大位今亢陽
爲虐皆予闕失所致汝其勉盡職業祇修實政以上答天變仍
命馳奏行在丁未太白晝見庚戌次于上都之六十店辛亥賜
岐陽書院額祀周文憲王仍設學官春秋釋奠秋七月丙辰朔
日食丁巳次上都之三十里店己未更定遷徙法驗所居遠近
以千里爲率在道遇赦者得放還再犯者徙本省不毛之地本

犯次妻子聽歸癸亥太白經天辛巳令諸王封邑達魯花赤擇
本部年二十五以上識治體者補充冒濫者罪及王傳八月乙
酉朔行在次于旺忽察都之地皇太子入見宴太子及諸王大
臣于行殿庚寅暴崩太子入臨哭盡哀燕鐵木兒傳皇后八不
沙命奉寶璽授太子遂還綱目云有謂燕帖木兒初上璽綬明
而明宗暴崩燕帖木兒聞哭聲卽奔入帳中取寶璽扶帝上馬南馳壬辰命伯顏爲左丞相欽察
台阿兒思蘭海牙趙世延並平章政事朶兒只爲右丞阿榮趙
世安並參知政事塔失鐵木兒知樞密院事鐵木兒補化鐵木
兒脫並爲御史大夫癸巳皇太子至上都乙未流諸王忽刺出
于海南巳亥復卽位大赦詔曰朕惟太祖肇造帝業列聖相承
世祖旣大一統卽建儲貳惜我裕皇天不假年成宗入繼纔十
餘載我皇考武宗歸膺大寶克享天心志存不私以仁廟居東

宮遂嗣宸極甫及英皇降割我家晉邸違盟構逆據有神器天
示譴告竟隕厥身於是宗戚舊臣協謀舉義正名討罪揆諸統
緒屬在眇躬朕興念大兄播遷朔漠以賢以長曆數宜歸力拒
羣言至於再四乃曰艱難之際天位久虛則衆志弗固恐隳大
業朕雖從請秉志不移是以固讓之詔始頒北迎之使隨遣尋
奉寶璽遠迂于途受寶卽位之日卽遣使授朕皇太子寶朕幸
釋重負實獲素心乃率臣民前迎大駕而先帝跋涉山川蒙犯
霜露道里遼遠自春徂秋懷艱阻于歷年望都邑而增慨徒御
弗愼屢爽節宣信使往來相望道路彼此思見交切於懷八月
一日大駕次王忽察都朕欣瞻對有期兼程先進相見之頃悲
喜交并何數日之間而宮車弗駕國家多難遽至于斯念之痛
心以夜繼旦諸王大臣復謂祖宗基業之隆先帝付托之重天

命所在誠不可違請卽正位以安九有朕以先皇奄棄方新摧
恒何忍銜哀辭對固請彌堅執誼伏闕者三日皆爲宗社大計
乃以八月日卽位于上都可大赦天下於戲哉定之餘莫急乎
與民休息丕變之道莫大乎使民知義惟爾中外大小臣工各
究乃心以稱朕意

時帝再卽位距明宗之崩止十日

庚子命阿榮趙世安督造

建康龍翔集慶寺且命臺臣監工癸卯幸世祖所御幄殿祓祭
遣欽察台還京師經理政務燕鐵木兒留上都監給恩賚金幣
已酉車駕發上都庚戌復改詹事院爲儲政院以衛候司及江
淮財賦諸色民匠二總管府隸之甲寅前丞相別不花潛與日
者推測聖算命安置集慶九月乙卯朔市故宋太后全氏田爲
大承天護聖寺永業改太禧院爲太禧宗禋院辛酉命凡往行
在所送寶官吏越次超升者皆從黜降丁卯帝至大都敕翰林

奎章閣輯本朝典故準唐宋會要名經世大典戊辰定後者頒
詔赦率日行三百里既受命而逗留三日及所至宴飲稽期者
治罪取賂者以枉法論甲戌廣西思明州黃宗永雲南威楚路
袁文鼎放木邦路渾都各遣子來貢丙子立溫州路竹木塲論
也先捏以不忠不敬伏誅癸未建顏子廟于曲阜所居陋巷冬
十月甲申朔帝服袞冕享太廟辛卯立元江宣慰司于雲南甲
午敕朝官以三十月爲一考外任以三年爲滿除風憲官外不
得越制遷調丙申命江西湖廣分漕米四十萬石以紓江浙民
力賜天妃廟額曰靈慈加上大行皇帝尊諡冊曰統必有宗生
嘗得以致其讓廟必有主歿思所以尊其名稽古考文宜天錫
誅欽惟先皇帝夙秉勇智惟時元良體傳次之成言避謳歌而
遜出雖身居絕域多歷於歲年而義動遠人樂爲之先後德威

孔著未堪大業之艱貞事變匪常猶閔生靈而愼動庶來蘇於
後戴爰戡定以奉迎已謹清宮俄虛黃屋臣民寡祐永遺惠澤
之敷施天日有靈尙想神明之如在禮嚴升祔誠備顯揚謹奉
玉冊玉寶上尊諡曰翼獻景孝皇帝廟號明宗伏冀睿慈俯回
飲假克綏丕祚垂裕無疆

見元文類
虞集撰

壬寅大寧路地震命諸王

公主官府寺觀賜田悉輸租於官給鈔以酌其直癸卯改瓊州
安撫司曰乾寧安撫司升定安縣爲南康州以土人王官知州
事甲辰徵朶朶王士熙等十二人于貶所放還鄉里追封三寶
奴爲郢城王諡榮敏庚戌以親祀太廟禮成詔天下罷大承天
護聖寺工役囚在獄三年疑不決者釋之免民間拖欠官錢無
可追徵者大都至上都諸驛供給繁重悉官爲應付免徵奉元
路商稅并各處煎鹽竈戶雜役申私宰馬牛禁十一月丙辰詔

列聖諸官后妃陪從之臣永給衣廩芻粟戊午特命朶耳只亦

都護爲河南行省丞相

近制行省不設丞相帝以其先朝舊臣不拘此例

癸亥以潤徽

伯知樞密院事位居衆知院上罷功德司入宣政院已巳以撒

迪爲中書右丞癸酉太陰犯填星丁丑造青木棉衣萬領賜圍

宿軍

舊制大朝會時皇城外皆無牆垣故用軍環繞名曰圍宿後相承用之

十二月丙戌詔百官

言朝政得失錄所上章疏善者卽行庚寅定風憲官赴任毋拘

遠近均給驛辛卯詔諸僧寺川當輸租者仍免役僧還俗者聽

復爲僧已亥加封大都城隍神爲護國保寧王加諡漢長沙王

吳芮爲長沙文惠王壬寅命江潮印佛經二十七藏甲辰罷土

番巡捕都元帥府以珙璐不花爲御史大夫兼領隆祥府事辛

亥改上都僊頭山爲天曆山壬子織武宗御容成卽神御殿作

佛事敕凡階開府儀同三司者班居一品上是歲陝西饑民百

二十三萬餘口河南餓死者二千餘人山東饑民六十七萬六千戶賑鈔百三十四萬九千六百錠糧二十五萬一千七百餘石討平四川囊加台雲南諸王禿堅之亂滇蜀悉定

至順元年庚午春正月丁丑遣使資黃金二千兩詣杭州書佛經已卯封太醫院使野理海牙爲秦國公辛巳改大都田賦提舉司曰宜農荆襄提舉司曰濟農香戶平江提舉司曰善農加

封秦蜀郡太守李冰爲聖德廣裕英惠王其子二郎神爲英烈

昭惠靈顯仁祐王

網鑑大全云冰爲郡守鑿離堆以溉民田二沃野千里而無水患號爲陸海蜀人德之

月壬午朔以趙世安爲御史中丞史惟良爲中書左丞雲南麓

川蒲蠻來貢丁亥命富民輸粟補官

江南萬石者官正七品陝西千五百石河南二千石

江南五千石者從七品自餘品級有差四川富民輸粟赴江陵者依河南例其不願仕乞封父母者聽僧道輸已粟者許加師號

庚寅命奎章閣譯國朝典章爲漢語入經世大典趙世延虞

集等專任纂修

舊文又有二月辛卯朔者誤

虞集等辭職帝曰昔我祖宗睿

知聰明其於致治之道自然生知朕以統緒所傳實在眇躬夙

夜憂懼自維早歲跋涉艱阻旣乏生知之哲於國家治體豈能

周知故立奎章閣置學士員日以祖宗明訓古昔治亂得失陳

說於前使朕樂於聽聞卿等其悉所學以稱朕意勿復再辭王

展籍張珪子五人家產自庚寅至甲午京師大霜晝雪丁酉帝

及皇后皇子與明宗皇子並受佛戒乙巳封明宗子懿璘質班

爲卿王平章朶兒失以罪免丁未命伯顏知樞密院事依前太

保錄軍國重事帝以燕帖木兒有大功欲獨相以尊異之諭省

臣曰昔世祖嘗以宰相一人總庶務故政治出于一今燕鐵木

兒爲右丞相伯顏旣知樞密院事左丞相其勿復置戊申以虞

集爲奎章閣學士敕正旦天壽節內外諸司贊獻仍如舊進辛

亥以屯田子粒錢萬錠助建佛寺市故瀛國公趙鼎田給大龍
翔集慶寺御史臺言不必予直帝曰吾建寺爲子孫黎民計若
取人田而不予直非朕志也行樞密院言戍雲南軍逃歸捕獲
法當死帝曰非臨陣而逃輒當以死何視人命之易邪其杖而
流之三月戊午封皇子阿剌忒納答剌爲燕王徙封濟陽王木
楠子爲吳王吳王潑皮爲濟陽王命彰德路歲祭姜里周文王
祠己巳以明宗升祔享英宗上祝願宗成宗廟遷例甲戌封諸
王速來蠻爲西寧王夏四月壬午朔立益都廣農提舉司括益
都般陽寧海閑田十六萬二千九十頃賜大承天護聖寺辛丑
明宗后入不沙崩

蓋皇后謀殺之也

己酉徙明宗長子妥懽貼睦爾于

高麗

即順帝

五月戊午羣臣上帝尊號曰欽天統聖至德誠功大

文孝皇帝是日改元至順詔天下丁卯英宗實錄成辛未置宣

忠扈衛親軍都萬戶府總幹羅斯軍以亦列出平章政事甲戌
八番軍西解苗侵邊詔樞密院分兵討之乙亥置順元宣撫司
統客刺斤軍六月辛巳朔河決大名庚子知樞密院事濶徹伯
脫脫木兒通政使只兒哈郎翰林學士教化的中政使尙家奴
謀殺燕帖木兒事覺並伏誅秋七月辛亥封諸王按渾察爲廣
寧王通渭山崩壓民舍乙丑以也兒吉尼知樞密院事庚午歲
星見民中書省言近歲帑廩虛空其費有五曰賞賜曰作佛事
曰創立衙門曰冒濫支請曰續增衛士鷹坊詔與院臺同加汰
減丁丑福州王薦以隱逸旌其門閭月庚辰朔封諸王卯澤爲
承寧王辛卯以脫亦納祭知政事趙世延以年老罷癸巳發鈔
萬錠分賜天曆初諸王羣臣死事之家戊戌封甘肅平章乃馬
台宣寧郡王駙馬謹只兒鄆國公戊申加封孔子父齊國公叔

梁紇爲啓聖王母魯國太夫人顏氏爲啓聖王夫人制曰闕里
有家系出神明之胄尼山請禱天啓聖人之生朕聿觀人文敦
求往哲惟孔氏之有作集羣聖之大成原道統則堯授舜傳之
周文王論世家則契至湯下逮正考父其明德也遠矣故生知
者出焉有開必先克昌厥後如太極之生天地如鉅海之有本
源雲仍旣襲於上公之封考妣宜視夫素王之爵於戲君子之
道考而不謬建而不悖於以敦典而敘倫宗廟之禮愛其所親
敬其所尊正以報功而崇德尙篤其慶以相斯文

見元文類
謝端撰發

成都沙糖戶三百人防遏敘州八月辛亥遣太禧院監蔚州廣

靈縣銀鑛歲入歸大承天護聖寺甲子烏蒙土官阿朝忠州土

官黃祖顯各遣子來朝戊辰太白犯氏壬申詔裁汰衛士

定大
內四

法薛每宿衛不過四百人累朝宿衛士各不過二百人鷹坊萬
四千二十四人或去或去九百九十九人四法薛當留者

各百人累朝舊邸宮分喪人三千二百二十四人當其汰去者
留千一百二十人賸臣怯憐口共萬人當留六千人

斥歸土著應役有容匿漢南高麗人及奴隸濫充者怯薛官與

其長各杖沒家貲之半九月庚辰罷入粟補官例大寧路地震

已丑熒惑犯鬼辛卯監察御史葛明誠劾遼陽平章哈刺鐵木

兒前經坐贓被杖王文若劾嶺北平章哈八兒秃鄙俚無知並

從其言罷黜癸巳白虹貫日置麓川路軍民總管府復立總管

府于哈刺火州甲午熒惑犯鬼積尸氣史惟良辭歸賜鈔三百

錠建五福太一宮于京城乾隅每歲四祭丁未以張友諒爲中

書左丞冬十月戊申朔飭衍聖公崇奉孔子廟事壬子立宣忠

扈衛親軍都萬戶營于大柵戊午帝致齋大明殿庚申出次郊

宮辛酉帝服大裘袞冕祀昊天上帝于南郊以太祖皇帝配禮

成大赦天下

自世祖至是凡七世有大祀皆攝事至是始舉親祀之禮

甲戌敕累朝宮分官

署凡文移無得稱皇后止稱某位下娘子其委用官屬並由中

書擬奏

元制每朝自正宮外率多稱皇后太祖光獻皇后外稱皇后者四幹耳朵共二十一位太宗憲宗各五位世祖

自順聖皇后外四幹耳朵共七

位他做此至是始定其稱謂云賜伯夷叔齊廟額曰聖清歲春

秋祀以少牢制曰蓋聞古者伯夷叔齊逃孤竹之封甘首陽之

餓讓爵以明長幼之序諫伐以嚴君臣之分可謂行義以達道

殺身以成仁者也昔居北海之濱遺廟東山之土休光垂乎千

載餘澤被於一方永懷孤峻之風庸示褒崇之典於戲去宗國

而辭周粟曾是列爵之可縻揚義烈以激清塵期於世教之有

補

見元文類

十一月辛巳陝西左丞怯烈坐受人僮奴及鸚鵡

御史臺論如律帝曰位至宰執食國厚祿猶受人生口罪固宜

也至以鸚鵡微物論贓失之苛嗣後凡饋禽鳥者勿以贓論甲

申獎惑退犯鬼丙戌太白犯壘壁陣樞密院請依舊制全給鷹

坊芻粟帝曰國用皆百姓所供當量入爲出朕豈以廩坊失所
重困吾民哉不從辛卯以濶濶台知樞密院事兼大都留守辛
丑徵河南民自實田糧不通舟楫者許以鈔代十二月己酉以
董仲舒從祀孔廟定國子生積分及等者省臺集賢院奎章閣
官同考試中式者依等第授官不中者復入學肄業辛亥立燕
王阿剌忒納答剌爲皇太子癸亥恩州諸王按灰坐擊傷巡檢
官杖之謫還廣寧王所部充軍甲戌敕各行省凡遇邊防有警
許便宜發兵是歲汴梁大名等路饑民六十七萬七千戶各給
米鈔安豐廬州饑以兩淮鹽課鈔賑之

二年辛未春正月己卯加大承天護聖寺僧寶峯瓊主嚴吉祥
爲司徒癸未立侍正府以總近侍遣官按行北邊牧地丁亥以
晉邸部民二萬四千餘戶隸壽安山大昭孝寺爲永業戶辛卯

皇太子阿剌忒納答剌薨祔葬山陵甲辰敕建孔子廟于後衛
乙巳監察御史劾本臺中丞和尙受婦人爲賂御史臺劾福建
宜慰使哈只燕南廉訪使卜咱兒貪污奎章閣纂書雅琥阿媚
權臣詔以赦前並禁錮元籍御史萬家閭嘗薦和尙脫脫嘗舉
卜咱兒並連坐封蒙古巫者所奉神爲靈感昭應護國忠順王

號其廟曰靈祐二月戊申立廣教總管府掌僧尼之政

曰京畿山後道

河東山右道遼東山北道河南荆北道兩淮江北道湖北京畿
道浙西江東道浙東福建道江西廣東道廣西兩海道又燕南
山東陝西甘肅四川府設達魯花赤同知判官各一員宣政院
雲南諸路凡十六所

選流內官擬注總管則以僧爲之四川懷德府驢谷什用田先

什用等及生蠻十二洞內附升其府爲宜撫司諸洞各設長官

已酉白虹貫日壬子太白晝見以伯撒里平章政事朶兒只班

參知政事高履亨許有壬並參議省事乙卯太白犯昴壬申雲

南景東甸蠻官阿只弄遣子獻馴象升甸爲景東府常賦外歲

增輸金五千兩修上都洪禧崇壽殿三月丙子朔癸亥犯鬼丙

戌雨土霾司徒香山陳符識請頒告中外不允

香山言陶弘景胡笳曲有負展

飛天曆終是甲辰君之語陛下生午紀號適合此實天命之符
翰林諸臣謂唐開元間太子賓客薛讓進武后鼎銘云上天降
聖方建隆基爲元宗受命之符姚崇表賀宋司馬光斥其采偶
合之文爲符瑞乃小臣之諂而宰相實之是侮其君也今從其
言恐啓識緯之端非所以定民志事遂寢癸巳製累朝神御殿名世祖曰元壽世祖

順聖皇后曰睿壽喃必皇后曰懿壽裕宗曰明壽成宗曰廣壽

順宗曰衍壽武宗曰仁壽皇妣昭聖皇后曰昭壽仁宗曰文壽

英宗曰宣壽明宗曰景壽御史臺劾大都總管劉原仁僥倖巧

宦工部尙書蘇炳性行貪邪詔罷其職壬寅析欽察爲左右二

衛癸卯以儒學教授聽選者多凡仕由內郡江淮者注江西江

浙湖廣由陝西兩廣者注福建由甘肅四川雲南福建者注兩

廣夏四月丙午朔全寧民王脫歡獻銀鑛詔設銀場提舉司隸
中政院庚戌頒天曆初兵興功賞帝曰燕鐵木兒首倡大義躬
擐甲胄伯顏在河南先誅搆賊使朕道路無虞兩人功無與比
其賞不可與衆同加賜七寶腰帶金帛真定武陟縣地震逾月
不止戊午命興和建屋居海青上都建屋居鷹鵠甲子平章欽
察台獻名園給鈔千錠酌其直御史張益劾欽察台在英宗朝
陰與中政使咬住造謀誣告反覆不可信用詔奪職禁錮廣東
且降旨獎益直戊辰奎章閣以修經世大典請從翰林國史院
取脫卜赤顏一書即今之起居注紀累朝故事學士承旨押不花言此
秘禁國書非可令外人傳者不與詔以泥金畏吾字書無量壽
佛經千部并大乘經一藏敕在京百司日集公署自晨及暮毋
廢事五月丁丑焚惑犯軒轅左角丙戌諭太禧宗禋院汰僧徒

累朝所建大萬安等十二寺舊額僧三千一百五
十人歲給衣糧今其徒畏多汰去九百四十三人
已丑置雲南
孟定孟育蘆傳三路總管府者線蒙慶甸銀沙羅等甸並爲軍
民府孟併孟廣者樣等甸並設長官司皆土人爲之癸巳威楚
路蒲蠻猛吾來朝願入銀爲歲賦詔置散府一及土司三十三
所甲午太白犯畢以平江官田五百頃立稻田提舉司隸宮相
都總管府乙未以脫別台知樞密院事纂修經世大典成丙申
八番西蠻官阿馬路入貢庚子太陰犯太白辛丑太白經天甲
辰改阿速萬戶府爲宣毅萬戶府六月乙巳朔徵儲政院鈔三
萬錠給中宮道路費丁未太白晝見乙卯御史陳良劾江淞廉
訪使脫脫赤顏私收父妾冒封詔罷職追還封制癸亥定辭訟
起減由已者罪加常人一等免控鶴衛士當驛戶丁卯太陰犯
畢太白犯井集賢大學士吳澄卒特徵河南儒士吳炳爲藝文

監典籍秋七月甲戌朔從藝文少監歐陽玄言改給衍聖公銀

印海南黎蠻作亂

時建大興龍普明寺于海南工費繁多黎人不勝其擾故亂

壬辰命脫別

台爲御史大夫乙未立閔子書院于濟南丁酉調甘州兵守參

卜郎以防土番戊戌封伯顏爲浚寧王八月甲辰朔日食封脫

憐忽脫魯爲靖恭王沙藍朶兒只爲懿德王內史怯烈該爲豐

國公甲寅御製上都孔子廟碑乙卯太白犯軒轅大星己未內

侍撒里不花坐巫蠱事杖流海南庚申太白犯軒轅左角九月

癸酉朔築駐蹕臺于大承天護聖寺東御史臺劾四川叅政馬

鎔冒借俸鈔娶妾且詬詈平章汪壽昌帝曰綱常之理尊卑之

分惜無所知其何以居上臨下可亟罷斥之又言江西叅政李

允中乃宦者李邦寧養子不堪任重選並削籍丙子太白犯填

星海南賊王周糾十九洞黎蠻作亂命湖廣左丞移刺四奴討

之癸巳罷供需府覆實司改立廣誼司禁諸驛毋畜竄行馬冬

十月丁巳以江浙平江等路水傷稼減明年海漕米遣官赴通

潮陵滄四州和糴粟豆以足國用乙丑立昭功萬戶都總府丙

寅命大都路定時估每月朔望送廣誼司以酬物價十一月壬

申朔日食詔四川給鹽雲南啖馬

亦奚不薛之地所收官馬歲給鹽以每月上寅日啖之則

馬錢無病此因亂雲南無鹽馬多死故令四川給之

丙子封諸王斡卽爲保寧王燕班爲

臨國公以耿煥叅知政事癸未帝養燕鐵木兒之子塔刺海爲

子賜居第詔每歲遣樞密院宗正府官巡察遼陽諸郡毋令諸

王所部擾民辛卯定諸鹽課鈔以十分之一收銀銀每錠五十

兩折鈔二十五錠十二月戊申西臺御史高垣劾御史陳良暹

勢蔑法有旨奪其敕命以黃金符鐫文曰翊忠狗義迪節同勳

賜都指揮使欽察旌其天曆初紅橋戰功壬子復命諸王忽刺

出還鎮雲南癸丑定諸職官父母在者三年聽給定省假無父母者五年聽給拜墓假各計道里遠近立限期其匿而不省親者坐以罪丁巳兩木冰辛酉遣官詣各道錄囚是歲徙妥懽貼睦爾于廣西之靜江發通州官糧賑檀順昌平民九萬餘戶出山東鹽課鈔賑益都民三萬餘戶博興州民九千戶

三年壬申春正月己卯廣西羅偉里叛寇馬武冲等合龍州嶺北明龍洞韋大蟲攻陷那馬達那馬安等砦壬午加封孔子妻耶國夫人开官氏爲大成至聖文宣王夫人制曰我國家悼典禮以彌文本闔門以成教迺睠素王之廟尙虛元媿之封有其舉之斯爲盛矣大成至聖文宣王妻开官氏來嬪聖室垂裕世家遽豆出房因流風於殿禮琴瑟在御存燕樂於魯堂功言邈若於遺聞儀範儼乎其合德作爾褱衣之象稱其命鼎之銘噫

秩秩彞倫吾欲廣關雝鵲巢之化皇皇文治天其典河圖鳳鳥

之祥可特封大成至聖文宣王夫人

見元文類
虞集撰

諸王章吉獻幹

羅思百七十人酌鈔五千錠庚子萬安軍黎蠻王奴羅寇陵水

縣夔路忠信寨洞主阿其什用寇施州二月辛丑朔詔修曲阜

宣聖廟命四川轉運鹽司兼邛州鹽井

邛州有二井宋舊名曰金鳳茅池天曆初九月

地震鹽水湧溢州民願作什器煮鹽輸課故令兼管

三月庚午朔發鈔萬錠給蒙古孤貧

人已丑復立功德司及典瑞司掌中宮歲作佛事癸巳改皇子

古剌答納名曰燕帖古思乙未帝師泛舟高粱河調衛士三百

人挽舟夏四月壬寅四川師壁散毛盤速出三洞蠻野王等大

盤洞謀者什用等來貢戊午命奎章閣譯貞觀政要鈐板印賜

百官五月己巳朔從撒迪請備錄帝固讓奏答及訓敕辭命續

爲蒙古脫卜赤顏一書置之奎章閣癸酉熒惑犯東井戊寅京

師地震戊子遣使往帝師所居撒思吉牙

吉牙一作加

之地以珠纈

制書宣諭其屬仍分給鈔幣庚寅置山東益都金銀銅鐵提舉司壬辰從太常博士王瓚言禁加封淫祠丁酉白虹並日出長竟天追封顏子父顏無繇爲杞國公諡文裕母齊姜氏爲杞國夫人諡端獻妻宋戴氏爲充國夫人諡貞素六月己亥朔給還朶朶王士熙脫歡等家貲並聽錄用己酉以趙世安爲中書左丞乙丑從御史陳思謙言嚴奪情起復之禁秋七月戊辰朔命僧于鐵幡竿修佛事施金百兩銀千兩鈔萬錠壬午江西行省造螺鈿几榻遣燕鐵木兒詔賜匠者帛八月乙巳天鼓鳴于東北丙午遣官祭社稷

每歲上戊之典泰定朝無文至是乃一祭

丁未有事于太廟己酉隴西地震帝崩于上都壽二十九癸丑葬起輦谷元統二年正月己酉上尊諡曰聖明元孝皇帝廟號文宗國語曰札牙篤

皇帝三月己酉祔于太廟

順帝本紀作四月己卯

後至元六年以帝謀不

軌使明宗欣恨而終詔除其廟主

周曰應變戡亂莫匪爾勞璽綬雖去太阿已操前車所鑒
燭影斧聲從來疑案多在弟兄

寧宗皇帝諱懿璘質班明宗次子也母皇后乃蠻眞氏明宗有
子二人長妥懽帖睦爾次卽帝文宗天曆二年封帝爲郕王文
宗崩右丞相燕鐵木兒請立皇子燕帖古思皇后導揚末命申
文宗固讓初志欲傳位明宗子時妥懽帖睦爾居靜江帝以文
宗所眷愛獨留京師於是燕鐵木兒請立帝遣使徵諸王會京
師甲寅中書省奉中宮旨預備大朝會賞賜金帛等物九月丁
丑與星犯太微垣左執法辛巳修皇太后儀仗是夜地震有聲
十月庚子帝卽位大赦詔曰洪惟太祖啓闢疆宇世祖統一萬

方列聖相承法度明著我皇祖入纂大統修舉庶政動合成法
授大寶位于仁宗傳及英宗曆數之歸實有攸屬我皇考及大
行皇帝各以播越遼遠時則有若燕鐵木兒建義効忠戡平內
難以定邦國協恭推戴大行皇帝登極之始卽以讓兄之詔明
告天下隨奉聖紱遠迓皇考朔方言還奄棄臣庶大行皇帝薦
正宸極仁義之至視民如傷恩澤旁被無間遠邇頌育眇躬尤
篤慈愛賓天之日皇后傳顧命謂聖體彌留益推固讓初志以
宗社之重應屬大兄世嫡乃遣使召諸王宗親來會大都同奉
遺詔揆諸成憲宜御神器以至順三年十月日卽位大明殿可
大赦天下於戲肆予冲人託天下臣民之上任大守重若涉淵
氷尙賴宗王大臣百司庶府交修乃職思盡厥忠嘉與億兆之
民共保承平之治時帝年七歲政務咸啟中宮取進止辛丑以

撒敦爲御史大夫撒迪平章政事濶里吉思爲右丞禿兒哈鐵
木兒知樞密院事復立撒政中政二院作兩宮幄殿車乘供張
已酉太白犯斗敕諸王駙馬大臣及省院臺秩正二品百司秩
至一品者關門內許施繩床以坐丙辰命江浙省範銅造宣聖
廟祭器凡百三十五事十一月壬申命郟王徹徹禿鎮遼陽戊
寅尊皇后曰皇太后御興聖殿受朝賀壬辰帝昀甲午葬起輦
谷後至元四年三月辛酉上諡曰冲聖嗣孝皇帝廟號寧宗四
月乙酉祔于太廟

顯帝紀作至
元三年事